



Sambanwá

GIYA SA PAGSAMBA KAN BANWAAN NIN DIOS

KAFIESTAHAN KAN PAGBONYAG KAN KAGURANGNAN
10 ENERO 2021 • PUTI

RITO SA PAGPOÓN

Pataratara

C — “An Surooon nin Kagurangnan.”

Ngonian na aldaw pinagsecelebrar niato an Pagbonyag ki Jesus ni San Juan Bautista sa salog nin Jordan. Para ki San Mateo an pagbonyag ki Jesus sarong Epifania o sarong pagpapahayag na nagsasabi na si Jesu Cristo sarong surooon asin Aki nin Dios. Iyo ini an pagka-tawo ni Jesu Cristo. Siya para sa gabos. Kun siring, bilang mga Cristiano, kita man inaapod na maglingkod sa satong kapwa. Dapat isabuhay niato an pangapodan na iyan asin ihiras sa ibang tawo, sa paagi nin pagserbe sa sainda sa gabos na oras kan satuyang buhay. Kita man mga surooon nin Kagurangnan.

Antifona sa Paglaog

(Cf. Mt 3, 16-17)

(Sinambit kun mayo nin Awit sa Paglaog)

Kan an Kagurangnan binonyagan, nabuksan an kalangitan, asin siring sa salampati an Espiritu nagbaba saiya, asin an tingog kan Ama nagsabi: Ini an Aki kong padangat, sa saiya ako naogmang marahay.

Pagpangurus asin

Pagtaong-galang (Tindog)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangnan mapa-saindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasalan, tanganing magkanigo kitang magcelebrar kan mga banal na misterio.

Gabos — Nagkukumpisal ako sa Dios na makakamhan, asin saindo, mga tugang, ta nagkasalà ako nin makuri sa isip, sa tataramon, sa gibo, asin sa kapabayaan: salà ko, salà ko, makuring salà ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Dios.

P — Maherak man lugod satô an Dios na makakamhan asin, pakapatawada an satong mga kasalan, darahon kita sa buhay na daing kasagkoran.

B — Amen.

Kagurangnan, maherak ka

P — Kagurangnan, maherak ka.

B — Kagurangnan, maherak ka.

P — Cristo, maherak ka.

B — Cristo, maherak ka.

P — Kagurangnan, maherak ka.

B — Kagurangnan, maherak ka.

Kamurawayan

Gabos — Kamurawayan sa Dios sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangnan na Dios, Hadeng langitnon, Dios Amang makakamhan. Kagurangnan Aking Bogtong, Jesu Cristo, Kagurangnan na Dios, Cordero kan Dios, Aki kan Ama, ika na nagpaparà kan mga kasalan kan kinaban, kaheraki kami; ika na nagpaparà kan mga kasalan kan kinaban, akoa an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita.

O Dios na makakamhan asin daing kasagkoran, solemneng pinahayag mo si Cristo, Aki mong namomotan, na binonyagan sa Salog kan Jordan mantang huminilig saiya an Espiritu Santo; warasan an saimong pag-ampon sa kaakian mo na binâgo kan tubig asin Espiritu Santo, tanganing padagos sindang magdanay sa saimong pagkamarahayon. Huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

B — Amen.

LITURGIA KAN TATARAMON

Enot na Babasahon

(Isaias 42, 1-4. 6-7) (Tukaw)

An surooon ni Yahweh sa libro ni Profeta Isaias, igwa nin mga kahulugan. Pwedeng an gustong sabihon kaini iyo an bilog na banwaan nin Israel, sarong hade o profeta kaidtong panahon, o sarong Mesias na maabot. Alagad, para sa mga evangelista asin sa Simbahan, an surooon ni Yahweh iyo si Jesu Cristo na nagpamidbid sa salog kan Jordan. An babasahon nagpapasabot satuya kan mision ni Jesu Cristo digdi sa kinaban.

Pagbasa sa Libro ni Profeta Isaias

Uya an sakuyang surooon, inampon ko siya, siya an sakuyang pinili, siya an nawiwilihan kan sakuyang kalag. Itinao ko saiya an sakuyang espiritu, nganing makatao siya nin tunay na katanosan sa mga banwaan. Dai siya nagkukurahaw, an saiyang tingog dai nadadangog sa mga tinampo; dai niya binabari an ronot na kawayan; dai niya pinaparong an mitsa na nagkikimat-kimat. Maimbod na itinatao niya an tunay na katanosan; dai siya nag-aalang-alang; dai siya mapadaog sagkod na an tunay na katanosan ikapagmugtak sa dagâ, huli ta an mga kaporohan naghahalat kan saiyang tugon. Ako an Kagurangnan: ika inapod ko na maglingkod sa katanosan: ika dinara ko sa kamot; ika inataman ko; ika ginibo kong tipan nin banwaan asin liwanag kan katawohan sa pagmuklat kan mata kan mga buta; sa pagligtas kan mga bihag asin kan mga yaon sa kadikloman nin mga bilanggoan.

Tataramon kan Kagurangnan.

Gabos — Salamat sa Dios.

Salmo Responsorio

(Salmo 29, 1-2. 3-4. 9-10)

S — **Bendicion** nin katoninongan, itatao nin Kagurangnan sa saiyang banwaan.

1. Mga aki nin Dios, magdolot kamo sa Kagurangnan: magdolot nin kamurawayan asin kaomawan: pag-omawon nindo an saiyang ngaran:

- sambahon nindo an Kagurangnan. (S)
- An tingog nin Kagurangnan nasa ibabaw kan mga tubig, an Kagurangnan nasa ibabaw nin mahiwas na mga tubig, an tingog nin Kagurangnan makapangyarihan; mamurawayon an tingog nin Kagurangnan. (S)
 - An Dios nin kamurawayan minapahiling; asin sa saiyang Simbahan gabos minasabi: "Pag-omawon!" An Kagurangnan nagtutukaw sa ibabaw kan baha; naghahade; an Kagurangnan maghahade sagkod pa man. (S)

Ikaduwang Babasahon

(Mga Gibo 10, 34-38)

Para ki San Pedro an pagbonyag ki Jesus sarong pagpapatotoo na siya an "linahidan kan Espiritu Santo asin tinawan nin kapangyarihan." Nin huli kaini naggibo siya nin mga karahayan asin pinaomayan niya an mga pinasakitan kan demonio. Siring man kaiyan an satuyang pangapodan bilang mga binonyagan na Cristiano. Linahidan kita tanganing magin kitang kabtang kan buhay nin Simbahan asin makasarô sa saiyang trabaho na iyo an mision ni Cristo sa kinaban.

Pagbasa sa mga Gibo kan mga Apostoles

Si Pedro nagtaram sa mga tawo na nagkatiripon duman sa harong ni Cornelio: "an katotoohan na sakuyang nanodan iyo na an Dios dai nin pinapalaen, kundi inaako niya an gabos na may pagkatakot sa Dios asin naggigibo nin matanos. Ipinadara nin Dios an saiyang Tataramon sa mga aki nin Israel. Ipinaghulit sainda an Marahay Baretâ nin katoninongan na hatod ni Jesu Cristo, Kagurangnan nin gabos. Kamo gabos nakadangog dapit kan mga nangyari duman sa Judea: dapit ki Jesus na taga-Nazareth asin kun pâno siya nagpoón sa Galilea, pagkatapos na paghulit ni Juan manongod sa bonyag. An Espiritu asin an kapangyarihan ilinahid saiya nin Dios asin huli ta an Dios yaon saiya naglibot siya sa paggibo nin mga karahayan asin sa pagpaomay kan mga pinapasakitan kan demonio."

Tataramon kan Kagurangnan.
Gabos — Salamat sa Dios.

Pagrokyaw (Mc 9, 6) (Tindog)

(Sinasantib kun dai inaawit an Alleluia)

Alleluia! An langit nabuksan: nadangog an Ama na nagsasabi: "Ini an sakuyang Aking namomotan: himatea nindo siya." Alleluia!

Evangelio

(Marcos 1, 7-11)

Si Jesus dai nangaiipo na bonyagan ni Juan duman sa salog nin Jordan. Alagad, an pagdolok niya ki Juan nagpapahiling nin sarong magayon na halimbawa sa mga tawo. An tingog na hale sa kalangitan nagpapatotoo kan mision ni Jesus. Ipinapamidbid si Jesus bilang "surogoon nin Dios."

P — An Kagurangnan mapa-saindo.

B — Asin sa saimong espiritu.

P — ✠ Pagbasa kan Evangelio susog ki San Lucas.

B — Kamurawayan saimo, Kagurangnan.

Ini an pinapasabot ni Juan sa tawo: kasunod ko an maabot an orog na makapangyarihan ki sa sako: dai ngani ako maninigo na dumuko sa paghubad kan bugkos kan saiyang sapin. Ako nagbobonyag sa tubig; siya mabonyag saindo sa Espiritu Santo. Kan an mga aldaw na idto si Jesus naghahawas na sa tubig, nahiling na an langit nabuksan asin an Espiritu Santo siring sa salampati, huminilig saiya, sarong tingog na hale sa langit nagsabi: Ika sakuyang Aki, sakuyang namomotan, sakuyang padangat.

P — Marahay na Baretâ kan Kagurangnan.

B — Pag-omaw saimo Cristo.

Homilia (Tukaw)

Pagrokyaw kan Pagtubod (Tindog)

Credo Niceno-Constantinopolitano

Gabos — Nagtutubod ako sa sarong Dios Amang makakamhan, kaggibo kan langit asin dagâ, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bagô kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saro sa pagka-Dios sa Ama: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(Sa mga minasunod na tataramon, abot sa asin nani-tawo, an gabos minaduko.)

Asin nani-laman huli kan Espiritu Santo ki Virgen Maria, asin nani-tawo. Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat susog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin

mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasalan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Mantang si Jesus nagpapamibi kan siya binonyagan, an Espiritu Santo naghilig saiya. Sararô kitang mamibi sa Dios Ama na kita man mag-ako kan Espiritu tanganing tabangan kitang mabuhay susog sa satong mga panuga sa bonyag.

S — Kagurangnan, hinanyoga an samong pamibi.

- Tanganing an mga namamayo kan Simbahan na pinakusog kan Espiritu gibohon an saindang mision na magin mga saksi kan pagkamoot kan Dios sa gabos na mga banwaan, ipamibi niato sa Kagurangnan. (S)
- Tanganing an mga magurang na Cristiano magin tunay na nakakasabot kan saindang espirtual na katongdan sa saindang mga aki na sa bonyag namundag-liwat ki Cristo, ipamibi niato sa Kagurangnan. (S)
- Tanganing kita gabos magin maimbod sa satuyang mga panuga sa bonyag asin paorogon an gibong pagligtas ni Cristo sa pakihiras sa satuyang kapwa kan mga inako niatong biyaya, ipamibi niato sa Kagurangnan. (S)
- Tanganing an mga naghehelang makagami-aw na huli kan saindang mga pagsakit sinda nagsasaksi sa buhay ni Cristo, ipamibi niato sa Kagurangnan. (S)
- Tanganing an gabos na mga gadan na binonyagan ki Cristo makisumarô sa saiyang kamurawayan, ipamibi niato sa Kagurangnan. (S)

P — Amang daing kasagkoran, sa pagbonyag samo ginibo mo kaming mga saksi sa saimong kamurawayan sa bilog nakinaban. Warasan na an bagsik kan Espiritu Santo magdanay samo tanganing padagos kaming magsaksi sa itinao mong pagtubod. Huli ki Cristo samong Kagurangnan.

B — Amen.

LITURGIA KAN EUCARISTIA

Pagdolot *(Tukaw)*

(Sinambit kun mayong Awit sa Pagdolot)

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — **Pag-omawon an Dios sagkod pa man.**

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — **Pag-omawon an Dios sagkod pa man.**

P — *(Tindog)* Magpamibi kamo, mga tugang: tanganing an sako asin an sindong atang maako man lugod kan Dios Amang makakamhan.

B — **Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.**

Pamibi sa mga Dolot

P — Kagurangnan, akoa an mga atang na dara kan pagpahayag kan saimong Aking namomotan, tanganing an pagdolot kan mga paratubod mo magin siring sa sacrificio niya na sa pagkaherak nagmawot na linigan an mga kasâlan kan kinaban. Siya na nabubuhay asin naghahade sa kapanahonan kan mga panahon.

B — **Amen.**

Prefacio

An Pagbonyag kan Kagurangnan

P — An Kagurangnan mapa-saindo.

B — **Asin sa saimong Espiritu.**

P — litaas an mga puso.

B — **Initaas mi na sa Kagurangnan.**

P — Magpasalamat kita sa Kagurangnan, satuyang Dios.

B — **Maninigo asin Dapat.**

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Ama, Dios na makakamhan na daing kasagkoran:

Na sa mga makangangalas na misterio pinahayag mo sa Jordan an bagong tubig nin Bonyag tanganing huli kan tingog na

nadangog gikan sa langit, tinubod na an saimong Tataramon nag-eerok sa katawohan; asin, huli kan Espiritu na naghiling siring sa salampati, namidbid si Cristong Surogoon mo, na linalang kan oleo nin kaogmahan, dangan sinubol sa paghulit kan marahay na bareta sa mga dukha.

Kaya kaiba kan mga Virtudes sa kalangitan, padagos kaming nag-secelebrar saimo sa dagâ kan kadakulaan mo, daing tapos na nagkukurahaw sa saimong kamahalan:

Gabos — Banal, Banal, Banal an Kagurangnan Dios ni mga hukbô. An langit asin dagâ pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia *(Luhod)*

P — Misterio kan Pagtubod.

B — **An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.**

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — **Amen.**

RITO SA PAGCOMUNION

Ama Niamo *(Tindog)*

P — Natukdoan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama niamo, na yaon sa langit: pabalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — **Huli ta saimo an kahadean, asin an kapangyarihan, siring man an kamurawayan sa mga kapanahonan.**

P — Jesu Cristong Kagurangnan, ika na nagsabi sa saimong mga Apostoles:

Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabotan. Ika na nabubuhay asin naghahade sa kapanahonan kan mga panahon.

B — **Amen**

Pagpahayag kan Katoninongan

P — An katoninongan kan Kagurangnan danay na mapa-saindo.

B — **Asin sa saimong espiritu.**

P — Magpatinaraohan kamo nin katoninongan

Cordero

B — **Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: tawi kami nin katoninongan.**

Pag-alok sa Pagcomunyon *(Luhod)*

P — Uya an Cordero kan Dios, uya an nagpaparâ kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunyon

(Jn 1, 32. 24)

(Sinambit kun mayong Awit sa Comunyon)

Uya siya na sinasabi ni Juan: Ako nakahiling asin nagsasaksi na siya an Aki kan Dios.

Pamibi Pakacomunyon *(Tindog)*

P — Mamibi kita.

Kagurangnan, kaming nabasog kan banal na atang, mapakumbabang naghahagad kan saimong pagkaherak, tanganing maimbod na naghihinanyog sa saimong Bogtong na Aki, kami tunay na apodon asin magin mga aki mo. Huli ki Cristo samong Kagurangnan.

B — **Amen.**

RITO SA PAGTAPOS

Solemneng Bendicion

P — An Kagurangnan mapa-saindo.

B — **Asin sa saimong espiritu.**

P — Iduko an saindong mga payo asin maghagad nin bendicion sa mahal na Dios.

Bendicionan kamo asin amponon nin Kagurangnan.

B — **Amen.**

P — Atamanon niya kamo asin iwaras sa saindo an Katoninongan.

B — **Amen.**

P — Bendicionan man lugod kamo kan Dios na makakamhan: an Ama, asin an Aki, ✠ asin an Espiritu Santo.

B — **Amen.**

P — Bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — **Amen.**

P — Lakaw kamo sa katoninongan ni Cristo.

B — **Salamat sa Dios.**



GIYA SA PAGMISA SA SEMANA

Enero 11, Lunes

Lunes sa Enot na Semana kan Ordinariong Panahon, Verde

Misa — Lunes sa Enot na Semana kan Ordinariong Panahon

Mga Babasahon — Heb 1, 1-6 | S 97, 1. 2. 6. 7. 9 | Mc 1, 14-20

Enero 12, Martes

Martes sa Enot na Semana kan Ordinariong Panahon, Verde

Misa — Martes sa Enot na Semana kan Ordinariong Panahon

Mga Babasahon — Heb 2, 5-12 | S 8, 2. 5. 6-7. 8-9 | Mc 1, 21-28

Enero 13, Miercoles

Miercoles sa Enot na Semana kan Ordinariong Panahon, Verde
o Memorial ni San Hilario, Obispo asin Doctor kan Simbahan, Puti

Misa — Miercoles sa Enot na Semana kan Ordinariong Panahon

o Comun nin mga Pastor: Para sa Obispo

o Comun nin Doctor kan Simbahan

(Hilingon sa Misal Romano sa Bicol: Propio nin mga Santos asin Santas, p. 72.)

Mga Babasahon — Heb 2, 14-18 | S 105, 1-2. 3-4. 6-7. 8-9 | Mc 1, 29-39

Enero 14, Jueves

Jueves sa Enot na Semana kan Ordinariong Panahon, Verde

Misa — Jueves sa Enot na Semana kan Ordinariong Panahon

Mga Babasahon — Heb 3, 7-14 | S 95, 6-7. 8-9. 10-11 | Mc 1, 40-45

Enero 15, Viernes

Viernes sa Enot na Semana kan Ordinariong Panahon, Verde
o Memorial ni San Arnold Janssen, Padi, Puti

Misa — Viernes sa Enot na Semana kan Ordinariong Panahon

o Comun nin mga Pastor: Para sa Sarong Pastor

Mga Babasahon — Heb 4, 1-5. 11 | S 78, 3. 4. 6-7. 8 | Mc 2, 1-12

Enero 16, Sabado

Sabado sa Enot na Semana kan Ordinariong Panahon, Verde

Misa — Sabado sa Enot na Semana kan Ordinariong Panahon

Mga Babasahon — Heb 4, 12-16 | S 19, 8. 9. 10. 15 | Mc 2, 13-17



sambanwá
GIYA SA PAGESAMBA KAN BANWAAN NIN DIOS



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID**, Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy. Ciudad nin Naga, Pilipinas • 2021

TABANGAN NA MASUSTENIR AN SAMBANWÁ!

Para sa mga donacion, puwedeng magdeposito sa:

Banko asin Branch: **BDO UNIBANK, INC. (BDO) PANGANIBAN DRIVE, NAGA CITY**

Account Name: **CACERES COMMISSION ON COMMUNICATIONS**

Account Number: **008440050319**